



DECÁLOGU PAL USU DE LA LLINGUA ASTURIANA NA UNIVERSIDÁ D'UVIÉU:

1.- La llingua asturiana ye una llingua propia d'Asturies, polo que la Universidá tien de caltenela, potenciala y curiala, garantizando'l so usu en tolos ámbitos universitarios. Los estatutos de la Universidá d'Uviéu han recoyer ente los sos oxetivos el d'actuar como ente promotor y dinamizador pa que la normalización llingüística seya un fechu real y visible pa la comunidá universitaria igual que pa la sociedá asturiana en xeneral. Lo mesmo hai que señalar pa la otra llingua propia d'Asturies: el gallego-asturianu.

2.- La imaxe corporativa de la Universidá d'Uviéu y de toles árees dependientes d'ella han ser por defectu n'asturianu o, nel so casu, priorizando l'usu del asturianu cuando se faga tamién n'otres llingües: na retulación de les dependencies, los impresos y documentos oficiales, cartelera, páxines web de la Universidá y de les sos Facultaes, redes sociales, etc.

3.- Ha ponese en marcha un Plan de Normalización Llingüística con unes estratexes, oxetivos y tiempos determinaos, amás de redactase un Reglamentu internu d'usos llingüísticos na Universidá d'Uviéu.

4.- Ha desendolcase un Serviciu de Normalización Llingüística, d'ámbitu tresversal, col oxetivu de normalizar l'usu de la llingua asturiana na Universidá.

5.- Tien qu'haber una llinia d'ayudes específiques pa la difusión n'asturianu en tesis, trabayos, ponencies, investigaciones, conferencies, etc.

6.- La docencia y la redacción de los esámenes va poder facese n'asturianu. Nos casos nos que la ufierta docente lo permita, los estudiantes han poder escoyer la docencia n'asturianu.



7.- Nes memories de verificación de tolos graos ha recoyese espresamente que van poder impartise total o parcialmente n'asturianu. La Universidá d'Uviéu ha garantizar el derechu al usu de la llingua asturiana y del gallego-asturianu na redacción y defensa de los trabayos de Fin de Grau, de Fin de Master, Tesis Doctorales, y de cualesquier otru trabayu o estudiu asoleyáu pola Universidá d'Uviéu.

8.- Han implantase asignatures de Llingua Asturiana específiques pa cada área en tolos graos impartíos pola Universidá d'Uviéu.

9.- Ha implantase na facultá de Filosofía y Lletres:

- Una Mención de Llingua Asturiana, en cuenta del Minor de Llingua Asturiana qu'esiste anguaño.
- La opción de Llingua Asturiana como llingua "A" nel grau de Llingües Modernes.
- Un Grau propio de Llingua Asturiana.

10.- Son necesarios unos presupuestos específicos de la Universidá d'Uviéu destinaos a la potenciación y puesta en marcha de les midíes descrites nos puntos anteriores.